

MAYBELINE ARENDS CROES 25 AÑA APORTANDO NA NOS CULTURA MUSICAL

Skirbi pa Joy Kock

Maybeline a nace na Aruba dia 27 di maart 1945. Na aña 1963 Maybeline a gradua na Colegio Arubano y a ricibi e diploma H.B.S.-A. E mesun aña ela sali pa Hulanda pa studia musica, locual semper tabata su deseo. Maybeline a gradua na aña 1968 y a ricibi e diploma "Muziekonderwijs Akte-A" na Hilversum. Desde su regreso di Hulanda na aña 1968 te awe, e ta docente di musica na Colegio Arubano y I.P.A.

Na oktober 1970 ela casa cu Karel Anthony Arends (Lito), kende tambe ta traha na Colegio como tecnico.

Na november 1972 a nace nan promer yiu homber, Carl Anthony cu a muri den un accidente di auto na oktober 1973. Hopi penoso. Na Januari 1975 a nace Igor I'hyam, kende awor aki ta studiando "electrical Engineering" na Merca.

Na februari 1978 a nace Giaira Sorina kende actualmente ta bayendo school den HAVO-3 na Colegio Arubano.

Lo siguiente ta e trabaoan cu Maybeline a checuta durante su 25 aña como maestra di musica:

Aug. 1968 te ainda: Maestra di musica na Colegio Arubano; Aug. 1969 Maestra di musica na Academia Pedagogico Arubano; Di 1971 pa 1974: Maestra di musica y lesnan di gitara na "Arubaanse muziek-school" merdia, den barionan di Aruba; Di 1969 - 1977: Dirigente di "St. Franciscus Koor" di misa di Playa; Di 1969 te ainda: Dirigente di e coro juvenil "Tutti Frutti". E coro aki a canta na Corsow y Bonaire tambe; Di 1975 - 1985: Dirigente di e grupo musical "The Singing Tweeties"; Di 1978 - 1988: Dirigente y manager di e conocido grupo "The Young Voices", kendenan a bai Sto. Domingo, Venezuela, Bonaire y Corsow; Di 1978 - 1985: Dirigente y manager di e trio di mucha "Los Tres Cochinitos"; Di 1980 - 1983: Dirigente y manager di e coro "Brisa Nobo"; Di 1968 - 1980: Dirigente y manager di e coro "The Sunrise" Di 1990 te ainda: Dirigente y manager di e grupo "Crystal"; Di 1989 te ainda: Dirigente y manager di e grupo "Starlight".

Na 1969: Dirigente musical di "Amor di Kibaima" cu 11 presentacion den C.C.A. y un na Corsow;

Na december 1983: Dirigente y producer di un programa di Pasco traha nafor di studionan

di TeleAruba; Di 1976 te ainda: Miembro di Comision Himno y Bandera; Maybeline tabata miembro di Arubaanse Kunstkring; Di 1986 te ainda miembro di directiva di UNOCA; Na oktober 1987: E a duna un "workshop" di tres dia na kleuterleidsters; Na november 1987: Ela duna un workshop di 1 dia na leidster-nan di creche;

Maybeline ta yudando diferente festivalnan di canto na Aruba: Festival Juvenil, Vozilandia, Festival Voz di Oro, Festival Cobia, Voz Supremo, O.T.I., Tumba di Mucha, Mini Merengue; y varios vez e tabata miembro di jurado durante festivalnan di musica y canto na Aruba, Bonaire y Corsow.

Ela dirigi hopi biaha coronan den diferente festival, tambe di O.T.I. na Aruba y Corsow.

Maybeline ta fungi como dirigente, coach, y producer di diferente solista y coro durante grabacionnan den recording-studio's na Aruba.

Maybeline a jega di coach y guia diferente di nos artistanan local durante di nan participacion den festivalnan den exterior, e.o. Trio Huasteca, Edwin Abath, Lila Richardson, Shalene Tromp na Puerto Rico, y Erika Giel na Corsow. Tambe e participantenan di O.T.I. durante di O.T.I.-Antillas na Corsow y Aruba, y diferente otro song-festivals na Aruba mes; Cu financiamiento di UNOCA, Maybeline a laga traha dos boeki. Un cu canticanan di Pasco, y un boek cu canticanan di Sinterklaas.

Actualmente e ta skirbiendo un boeki "muziek-didactiek" pa kleuterleidsters y maestronan di kleuter y schoolnan basico na Aruba y Antillas. Ela tene charla den Biblioteca Nacional over di musica y over di Motito. Ela traduci canticanan conoci na papiamento; Ela compone algun cancion, mas tanto canticanan di mucha. Esun conoci ta "Llanto di Mama" (Pasco) riba letra di H.Booi.

E tin produccion di disco 45 cu "Sunrise" y "Young Voices", tambe diferente produccion di cassette canta pa coro "Tutti Frutti" y solista.

Maybeline a participa na diferente congreso den exterior pa amplia su conocimiento riba tereno musical. Tur aña e tabatin un of dos ora di show di Pasco na TeleAruba, gesponsored pa Cocktail Musical,

Cultura y Educacion, Gobierno di Aruba, Lago etc. Tambe show na Showtime y Cocktail Musical.

Maybeline y su coronan ta canta den misa, (bao eucharistia) pa Prome Santa Comunien, pa Confirmacion, pa Matrimonio, pa Entierro, y pa ocasionnan especial. Nan ta canta hopi hopi serenata. Nan ta canta pa comedia di mucha, show di ballet, na C.C.A., pa instantenianan caritativo, na restauranten, na hotel, Bon Bini Festival, pa Sinterklaas, Pasco, Dia di Mama, Carnaval, pa negoshinan den tempo di Pasco, etc.

Tambe na Imelda Hof, Maristella, Paviljoen, Hospitaal, pa bishita di La Reina y prinses, pa Sabado Sensacional. Nan ta canta (back-up vocals y/of 2de stem) pa diferente artistia cu a graba disco/cassette/C.D. den studio. Nan a canta pa celebracion di 18 di maart; nan ta canta cu pista cu orquesta of simplemente cu guitarra.

Hopi di su alumnonan awor nan mes ta dirigi grupo of duna les den musica of a bira cantante/musico profesional, of ta participa y gana na diferente festival, of a bai sigi studia musica of ta participa activamente den gruponan musical local.

Na 1987 nan a filma cu TeleAruba un bunita programa di 1 ora cu e coro Tutti Frutti, saca na diferente bunita lugar conoci na Aruba. Nan a canta pa transmision di Television Japones na Caribbean Hotel na 1987. Na 1988 nan a canta durante di un siman largo den temporada di Pasco pa e Kerstboom Actie, tur anochi den un otro distrito. Maubeline ta toca un poco piano, guitarra y cuarta. Dia 5 di september 1993 nan a canta un bunita Misa na Playa, cu actonan inovativo e "Nos Tata" y "Heal the World".

Desde 1991 Maybeline ta dirigi un coro di homber "The Ambassadors" cu a presenta pa ocasionnan especial.

Na juni 1993 Maybeline a bai congreso di "Musica y Liturgia" na St. Louis, USA. Dia 5 di sept. '93 ela haci den Misa di Playa algo di locual ela siña na St. Louis, esta: Cui E "Nos Tata" cu ta composicion di Hildward Croes, a wordo canta ariba altar pa e Coro Tutti Frutti y movecionnan di man a wordo haci acerca, cu ta pas cu e contenido di e oracion aki canta.

Tambe na final e grupo a cera cu "Heal The World" na papiamento, (solo: Sergio) unda e miembronan di Coro "Tutti Frutti" conhuntamente cu tur hende den misa a tene man y zwaai man uni, cantando e cancion aki. Tabata bunita y conmovedor pa weita full e misa manera un solo pueblo di Dios uni ta canta hunto.

HOBBIES; Apart di musica, Maybeline ta gusta: Hunga Volleball, Bowling, Landa, Bolas Criollas, Lesa boeki (Danielle Steel), y di vez en cuando ora cu e tin tempo, e ta experimenta den cushina y purba traha bolo. E ta gusta hunga carta of otro weganan social. E ta gusta baila, y actualmente e ta siguiendo lesnan folklore cerca Simadanza y Jazz Monique Dumfries.

Personalmente mi a traha hunto cu Maybeline den innumerable ocasion manera, produccion di Television, Festivalnan di OTI, Voz Juvenil, Voz di Oro, Voz Supremo. Den e record cu hamas por ser kibra y por wel di bai den Guinness Book of Records, Aruba a gana Corsow den tur e festivalnan di OTI-Antillas, cu excepcion di uno. Den tur e festivalnan aki, Maybeline a dirigi e coro. Sinembargo e experiencia mas grandi cu mi persona y Maybeline a

pasa aden, tabata dia 17 di maart 1976, mainta, na momento cu sr. Betico Croes (q.e.p.d.) ta yama nos y puntra, si Orquesta Aruba y un coro por canta nos Himno oficialmente pa promer vez na Aruba. E motibo cu sr. Betico Croes q.e.p.d. a acerca mi persona y Maybeline tabata, cu e coro cu mester a canta e Himno, a laga sa cu nan no por canta mas.

Mes anochi, 17 di maart, Maybeline a yama via telefoon, tur su miembronan di coro juvenil, y ami a jama tur e musiconan di Orquesta Philharmonica Aruba. Dia 18 di maart 1976, 2:30 di merdia, den solo cayente, nos a train (practica) na Wilhelmina Stadion y anochi nos a inaugura nos Himno, y nos Bandera a bula pa promer vez oficialmente. Nada no ta imposibel cu e dedicacion necesario.

E aporte di Maybeline, nieta di nos tesoro nacional, Motito q.e.p.d. ta enorme. Y conociendo Maybeline di cerca, nos sa cu elo sigi contribui cu su conocemento amplio na binestar di nos Cultura Musical y na su pais natal en general.

Maybe, ricibi di nos tur cu tin aña y aña ta trahando hunto cu bo, e mas caluroso pabien y cu nos Creador por duna abo y bo distinguida famia forza pa continua cu e bunita y valioso trabaoan aki.